

03. Oktober

Inatsisartuni aalajangiiffigisassaattut siunnersuut Naalackersuisut kingusinnerpaamik 2017-imi aningaasaateqarfimmik 4 mio koruunit tikillugit aningaasaateqartumik pilersitsinissamik saqqummiussissasut, aningaasaateqarfiup aningaasalersussallugu angajoqqaat kisermaat 180.000 koruunilluunniit ataallugit isertitallit meeraasa nunatsinni nunattalu avataani angalasarnissaat.

(Inatsisartunut ilaasortaq Agathe Fontain, Inuit Ataqatigiit)

Inatsisartunut ilaasortap Agathe Fontainip aningaasaateqarfimmik angajoqqaanut kisermaanut 180.000 kroner sinnernagu aningaasarsialinnut nunatta iluani imaluunniit nunatta avataanut angalanissamik periarfissaqartinneqarnissaannik aningaasaateqarfiliornissamik siunnersuutaanut Siumumit imaattumik oqaaseqaateqassaagut:

Inatsisartunut ilaasortap siunnersuutaanut Siumumit isummerneranut ima paasinninnerput oqaatigissavara; meeraq arnaa ataataaluunniit kisimiittoq 180.000 kroner sinnernagu isertitallip paasisassarsiorluni nunatta iluani imaluunniit nunatta avataanut sumuugaluarnersoq angalasinnaanissaminut aningaasaateqarfimmut qinnuteqarsinnaaffigisassaanik pilersitsisoqarnissaanik aappaagumut aningaasanut inatsisissamut naalackersuisut 4 mio kroner immikkoortissagaat taamaalilluni fondimik pilersitsisoqarsinnaassalluni.

Saqqummiussilluni uannga oqaluuserisassamik qaqitsisoq isumaqatigilluinnarparput ilaatigut tunngavilersuutimini eqqaammagu meeqqap alapernaasseruttornerani angalasiaqartarnissaa pingaartuummat, aammalu piffimmi meeraanermi Siumumiit ilisimaaraarput qanoq meeqqap ilikkallorissusia ajunngitsigisarmat.

Taamaattorli uuma oqaluuserisassanngortinneqarneranut suliap ingerlateqqinneqarnissaannut tunngavissat aammalu sinaakkutissat annertuumik amigaateqarnerat Siumumiit maluginiarparput. Tassa ilaatigut makku apeqqutigineqarsinnaammata. Ukiumut qasseriaq periarfissaqartinneqassappat? Angalanissamut aningaasartuutissaq qanoq amerlatigissappat? Aammalu meeqqat angalasut kiap angalaqatigisassavai?

Taamaattumik Siumumiit Naalackersuisut itigartitsinissamut kaammattuuteqarnerminni tunngavilersuutaat paasilluarpagut aammala matuma siunnersuutip itigartinneqarnissaa inassutigaarput.

Ineqi Kielsen

Siumut